

Uunga siunnersuut: Meeqqanut suli atualingitsunut perorsaaniikkut inerikkiartuutaasunik ulluunerani neqeroorutit pillugit Inatsisartut Inatsisaat

(Meeqqanut, Inuusuttunut Ilaqutariinnullu Naalakkersuisoq)

Saqqummiussissut

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Meeqqap inuunerata ukiuini siullerni ulluunerani neqeroorummi imaluunniit ulluunerani paaqqinnittarfimmi aallartinneq pisut pingaaruteqartut ilagaat. Taamaattumik piffissaq meeqqap angerlarsimaffiup avataaniinnera siulleq pitsaasumik ikaarsaarfiussasoq kiisalu toqqissimasumik atugaqarfiussasoq ataatsimoorluta qulakkiissagipput pingaaruteqartorujussuuvoq.

Meeqqap ulluunerani neqeroorummi ulluuneranilu paaqqinnittarfimmi aallartinneranut atatillugu eqqarsaatigisassat, misigisat misigissutsillu amerlaqaat, pingaartumik angajoqqaanut tunngatillugu. Inuiaqatigiittut atugarissaarneq, ilikkariartorneq aamma inooqataanermi nalinginnaasumillu piginnaasat ineriartornerat siuarsarniarlugit kiisalu meeqqap atualernissamat piareersimanissaata qulakkeernissaa pillugu akisussaaffik meeqqamullu pitsaanerpaaq isumagissavarput. Meeqqanut immikkut iliuseqarfigineqarnissamik pisariaqartitsisunut pinaveersaartitsinermik tapersersuisunillu iliuseqarnissamat siusissukkat ukkataqassaagut.

Tamakkiisumik naalakkersuinikkut anguniakkat Naalakkersuisut suleqatigiinnissamat isumaqatigiissutaanni, Inuuneritta III-mi – Naalakkersuisut meeqqat inuunerissut pillugit suleqatigiinnissamik periusissiaa 2020-2030-mi aamma Naalagaaffiit Peqatigiit Meeqqat pisinnaatitaaffii pillugit Isumaqatigiissutaanni kiisalu isumasioqatigiissitsinermi isumaliutersuutigisat oqaatigineqarput. Taakku ataatsimoorlutik Meeqqanut suli atualingitsunut persorsaaniikkut inerikkiartuutaasunik ulluunerani neqeroorutit pillugit Inatsisartut inatsisaata atuuttup atuutilersinneqarneranit allannguinnissamik pisariaqartitsilersimapput. Siunnersuut suli atualerneqanngitsunut ullutsinnut naapertuuttumik eqaannerusumillu inatsiseqalernissaata qulakkeerneqarnissaanik siunertaqarpoq.

Suli atualerneqanngitsunut suliniuteqarnerup aaqqissuunneqarnissaa pillugu eqaatsumik atugassaqartitsinissaq siunnersuummi anguniarneqarpoq, tassani ilaatigut meeqqat inuusuttullu pillugit suliaasaqarfimmi qitiusumik suliaqartut suliniutinut aallartisarneqartunut atatillugu piginnittuunissaat isiginiarneqarluni.

Allannguutit ilaatigut ulluunerani neqeroorutitut utaqqisunut allattorsimaffimmut piunasaqaatit nammineq pingaarnersiorsimasat tunngavigalugit kommunalbestyrelsit ataasiakkaat inissamik tunniussisinnaanissaannut tunngassuteqarpoq. Siunnersuummi meeqqat pillugit mappinik digitaliusunik aamma/imaluunniit pappilianngorlugit sanasoqarsinnaanissaa aamma anguniarneqarpoq.

Siunnersuummi meeqqanut immikkut pisariaqartitsisunut atatillugu siusissumik iliuseqartariaqarnerup ersarissarneqarnissaa aamma siunertarineqarpoq. Tamatumani

meeqqat ataavartumik timikkut, tarnikkut, paasinnissinnaanikkut malussarniutigulluunniit pisinnaasakinnerusut imaluunniit allatigut immikkut pisariaqartitsisut ilippanaatiminnik tamakkiisumik piviusunngortitsisinnaanissamut naammaginatumillu atuarnermik ingerlatsisinnaanissamut atatillugu meeqqat allat assigalugit sapinngisamik periarfissaqartinneqarnissaat qulakkeerniarneqarpoq.

Siusissumik iliuseqarnikkut innarluuteqarnerup allatigulluunniit pisinnaasakinnerunerup sivirusumik sunniuteqaratarsinnaanera kingunerluuteqaratarsinnaaneralu annikinnerulertarpoq. Tamatumunnga atatillugu meeqqat immikkut pisariaqartitsisut sapinngisamik siusinnerpaamik misissorneqartarnissaat pisariaqartutut nalilerneqarpoq, tamannalu nappaammik sukkasuumik suussusersinissaq siunertaralugu suliassaqarfiit akornanni pisariaqarluni, assersuutigalugu isumaginninnermut peqqissutsimullu immikkoortut kiisalu perorsaanikkut tarnikkullu atukkatigut siunnersuisarfik (MISI) peqataatillugit.

Aamma malugeqquneqassaaq siusissumik iliuseqarnissami nappaammik suussuserseqqaarnissaq pisariaqassanngimmat, meeqqallu immikkut pisariaqartitsineranut takussutissaqalerniariarpat meeqqamut tapersersuinerup aallartinneqarnissaa siunertarineqarluni. Inissisimaffinni tamani ineriartornermut ilinniartitaanikkullu iliuserineqartut pitsanngorsarniarlugit ataqatigiissumik suliniuteqarnissaq siunertaralugu misissuinerit ingerlanneqartussat, tamatumani atugarissaarnermik misissuinerit atualernissamullu piareersimanermik misissuinerit, ingerlanneqartarnerisa attanneqarnissaat siunnersuummi pilersaarutigineqarpoq. Tassunga atatillugu meeqqat atualernissamut piareersarnissaat atualernissamullu soqutiginnilersinnissaat anguniagaavoq pingaaruteqartoq, tamannalu suli atualinngitsuni ingerlanneqartareerpoq.

Atualernissamut piareersimaneq ukiunullu naapertuuttumik ineriartorneq ilinniagaqalernissamut piumasaqaataavoq. Meeqqat atualinnginnerminni uummarissarneqarsimanissaasa qulakkeerneqarsimanissaa, nalinginnaasumik isummanik ilikkarsimanissaat, inooqataanermi piginnaasaasa ineriartorsimanissaat kiisalu immikkut pisariaqartitsinerimut atatillugu misissorneqarnissaq siusissukkullu iliuseqarfigineqarnissaq siunertaralugu nakkutigineqarsimanissaat pingaaruteqarpoq.

Ataatsimoorluta meeqqamut pitsaanerpaaq inuiaqatigiinnilu isumalluut nukittunerpaaq qulakkeertigu.

Naalakkersuisut sinnerlugit siunnersuutip Inatsisartunit kajumissusilimmik suliarineqarnissaanut ingerlateqqippara.